

قصيده اعمل كفيف

زمان ربانى أبوى على الرجوله
وقالى إياك يابنى تكون ضعيف.
وفى الحق ياإبنى. تقف بشده
وتتكلم بحده وتكون عنيف .
وإياك ياإبنى تمد إيدك. لحد غيرك
خليك دايماً راجل عفيف .
ولو عايش تعبان وكمان جعان
ومش لاقى حتى. حق الرغيف.
إياك تطاطى وخليك نزيه وعلى طول شريف .
الله يرحمك يابا
لكن زمانك كانت الناس غلابه
وفيه طيابه وعمرها مابتيجى على الضعيف .
لكن دلوقتى يابا فى ناس ديايه
ومن مكرهم بأقول يالطيف.
دلوقت يابا الحق ضايع
والعدل مايه بشكل مخيف .

ده زمانا يابا . بقى الكذب بالدور .
ومفيش مانع من شوية نفاق مع زور
وكله تطوع مش تكليف .
يابا دي الحقيقه بتبقى واضحة .
وألوانها كلها فاتحة .
لكن فجاء تلاقيها باهتة
بقوه الباطل وسطوه التزييف .
والشكاوى والمظالم على بعضها
وفوق بعضها . رزم ومتستفة تستيف .
والباشا شايفها والبيه عارفها .
لكن الباشا عامل أطرش والبيه عامل كفيف .
يعنى زمانا يابا . شجره الأخلاق والمبادئ
شجره ضعيفة فى فصل خريف .
فمتزعلش مني والله غصب عني
أنا هاأربى إبنى يكون جبلة
وميزعلش أبداً من التعنيف
ولازم يكون كمان لطيف
ويعمل أهبل وكمان ظريف .
وهاقوله كمان .
الرجوله ياإبنى كانت زمان .

دلوقت ياإبنى . مصيرها الرصيف .
وهقوله ياإبنى قبل سلامى
إسمع بقى آخر كلامى .
طالما يابنى ضهرك ضعيف .
فى زمن معياره .
الصفوه والجمع واللفيف .
تبقى أنت ياإبنى .
فى زمن التحريف والتصنيف والتغليف .
فإياك يابنى تكون ساعتها .
راجل شريف أو نضيف أو عفيف .
لازم تعمل أهبل وكمان عبيط
وخليك مفتح . بس لازم ياإبنى تعمل كفيف .
معلش يابا شكلى تعبتك وقلقتك فى نومتك .
بس أدى ربايتك أعصابى تعبت
.وعقلى فوت. وبقى خفيف.
ياريتك يابا زى ما علمتنى أشوف الغلط
ياريتك علمتنى إزاي أغمض. وأعمل كفيف